

## Inatsisissatut siunnersuummut nassuiaatit

**Nassuiaatit nalinginnaasut****1. Inatsisissatut siunnersuutip tunngavia**

Naalakkersuisut maannakkut naalakkersuinikkut inassisimaneq tunngavigalugu Inatsisartut noqqaaffigivaat Inatsisartunut immikkut ittumik qinersisoqarnissaanik.

**2. Inatsisissatut siunnersuutip imarisaa**

Inatsisissatut siunnersuutip nassatarisaanik ulloq 28. november 2014 Inatsisartunut immikkut ittumik qinersisoqassaaq.

Tamatuma saniatigut inatsisissatut siunnersuutip nassatarisaanik partiit qineqqusaarnissaminnut 3.754.000 kruuninik aningaasaliiffigineqassapput, taamatullu aamma Namminersorlutik Oqartussat qinersinernut aningaasartuutitut allanut aningaasaliissutaat atuuttut kr. 1.000.000-inik qaffanneqassallutik, aningaasaliissutit katillugit kr. 1.100.000-inngorlugit.

**3. Pisortanut aningaasaqarnikkut allaffissornikkullu kingunerisassat**

Qinersisarneq pillugu inatsimmi § 56 malillugu naqitanut, tamanut saqqummiinernut taasivissanullu kiisalu sumiiffinnut kommunit aggornerisa avataanniittut eqqarsaatigalugit immikkut aningaasartuutit Nunatta Karsianit akilerneqassapput. Qinersinerup ingerlanneqarneranut atatillugu aningaasartuutit allat kommunimit pineqartumit aningaasartuutigineqassapput.

2014-imut aningaasanut inatsimmi kontumi pingaarnermi 20.01.07-imi Qinersinernut aningaasartuutit 100.000 kr.-it aningaasaliissutitut immikkoortinneqarsimapput. Inatsisissatut siunnersuutip malitsigisaanik aningaasaliissutit taakku kr. 1.000.000-inik qaffanneqassapput. § 3, imm. 2-mut nassuiaatit innersuussutigineqarput.

2014-imut aningaasanut inatsimmi kontumi pingaarnermi 20.05.34-imi Partiit qineqqusaarnerinut tapiissutit 0 kr.-it aningaasaliissutitut immikkoortinneqarsimapput. Inatsisissatut siunnersuutip malitsigisaanik aningaasaliissutit taakku kr. 3.754.000-inik qaffanneqassapput. § 3, imm. 1-imut nassuiaatit innersuussutigineqarput.

**4. Inuussutissarsiortunut aningaasaqarnikkut allaffissornikkullu kingunerisassai**

Siunnersuutip inuussutissarsiortunut aningaasaqarnikkut imaluunniit allaffissornikkut kinguneqarnissaa naatsorsuutigineqanngilaq.

**5. Avatangiisinut, pinngortitamut inuiaallu peqqissusaannut kingunerisassai**

Siunnersuutip avatangiisinut, pinngortitamut inuiaallu peqqissusaannut kinguneqarnissaa naatsorsuutigineqanngilaq.

**6. Innuttaasunut kingunerisassai**

Siunnersuut allaffissornikkut innuttaasunut kinguneqarnissaa naatsorsuutigineqanngilaq.

**7. Kingunerisassat allat pingaaruteqartut**

Inatsisissatut siunnersuut allatigut pingaaruteqartumik kinguneqarnissaa naatsorsuutigineqanngilaq.

**Inatsisissatut siunnersuutip aalajangersagartaanut ataasiakkaanut nassuiaatit***§ 1-imut*

Siunnersuutigineqarpoq ulloq 28. november 2014 Inatsisartunut immikkut ittumik qinersisoqassasoq. Ullup qinersiviusussap aalajangersarneqarneranut atatillugu qinersisarnermut inatsimmi killiliussat, qinersinissamut atatillugu piareersarnermi malinneqartussat eqqarsaatigineqarsimapput, soorluttaaq aamma qinersinissamut piareersarnissaq aamma pingaartinneqarsimasoq.

*§ 2-mut*

Siunnersuutip nassatarisaanik ukiunut sisamanut qinigaaffik qinersisarneq pillugu inatsimmi aalajangersarneqarsimasoq qinigaaffik manna eqqarsaatigalugu sanioqqunneqassaaq.

*§ 3-mut*

Imm. 1-imut

2014-imut aningaasanut inatsimmi kontumi pingaarnermi 20.05.34 Partiit qineqqusaarnissaannut tapiissutini 0 kruunit aningaasaliissutigineqarsimapput. Inatsisissatut siunnersuutip nassatarisaanik aningaasaliissutit taakku 3.754.000 kruuninik qaffanneqarput.

Naalackersuinnikkut suliaqarnermi peqataanermut atatillugu aningaasartuutininik matussusiissutissanik aningaasanik qinersinissaq sioqqullugu tapiissuteqarneq naalackersuinnermut suliaqarnermut tapiissuteqarnissaq pillugu Inatsisartut inatsisaanni nr. 1-imi 31. maj 2001-imeersumi § 6 naapertorlugu aningaasaliisoqarsinnaavoq. Aalajangersagaq pituttuisuunngilaq, imatut paasillugu, partiit, qinigassanngoqatigiit imaluunniit qinigassanngortittut ataasiakkaat qineqqusaarnissaminnut atugassaminnut tapiissutisinissartik inatsisitigut pisinnaatitaaffiginngilaat.

Tapiissutit tunniunneqartarput – qinnuteqareernikkut – qinigassanngortittut ulloq nalunaarfissaat kingulleq qaangiutereeraangat Qinersinermilu Ataatsimiititaliap qinigassanngortittut qinigassanngortissinnaanerakku akuersissutigereeraangagu.

Inatsisartunut immikkut ittumik qinersinissamut tunngatillugu piumasaqaataavoq, tapiissuteqarnermi Inatsisartuni qinersinermi ullormi 12. marts 2013-imi pisumi taasinerit agguataarneri naapertorlugit tapiissuteqartoqassasoq, taamaattorli Partii Naleqqamut tunngassuteqartoq ataa takujuk.

Taatinneq ataaseq 100 kruunimik tapiissutisissutigineqassaaq, 2013-imi partiit tapiissutisarisattut. Taassuma saniatigut partiit tamarmik tunngaviusumik 100.000 kruunimik tapiissutisissapput.

2013-imi partiit qinigassanngortitaqarsimasut qinigassanngortitsinissaannillu naatsorsuutigineqartut taaneqarnerat imatut agguataarsimavoq:

Atassut 2.454

Demokraatit 1.870

Inuit Ataatigiit 10.374

Partii Inuit 1.930

Siumut 12.910

Partii Naleraq 2013-imi qinigassanngortissimanngitsoq, kisianni maannakkut qinigassanngortissinnaasoq ullumi ataatsimik Inatsisartuni issiatitaqarpoq. Partiip tunngaviusumik taasinnermut tapiissutit saniatigut taatinnermut ataatsimut 100 kruunimik taperneqarnissaa naatsorsuutigineqarpoq, 2013-imi qinersinermi ilaasortaaitap pissarsiarisai (taasinerit 623-t) tunngavigalugit.

*Imm. 2-mut*

2014-imut aningaasanut inatsimmi kontumi pingaarnermi 20.01.07-imi Qinersinernut aningaasartuutit 100.000 kr.-inik aningaasaliissutinik immikkoortitsisoqarsimavoq. Inatsisissatut siunnersuutip malitsigisaanik aningaasaliissutit taakku kr. 1.000.000-nik qaffanneqassapput.

Qinersinnermut, soorlu qarasaasiat atorlugit taasinnermi periaatsip ingerlanneqarneranut ineriartortinneqarneranullu isumaqatigiissummut, naqitertitanut, tamanut saqqummiussinernut, taasivissanut, qinersinissaq pillugu paasissutissiinernut kiisalu kommunit aggornerisa avataaniitunut atatillugu immikkut aningaasartuutit, Namminersorlutik Oqartussat aningaasartuutaat tamarmik kontumit pingaarnermi tassannga aningaasartuutigineqassapput.

*§ 4-mut*

Inatsisartut inatsisaata ulloq 1. oktober 2014-imi atuutilernissaa siunnersuutigineqarpoq.